

同安縣志卷之二十

人物

古稱不朽者三立功立德立言同邑向稱海邦
鄒魯文物聲名通於上國自宋迄今學問事功
文章氣節代有其人况爲朱子過化之區士君
子服習詩書敦尙禮義賢才奮興彬彬日盛共
閒理學經濟忠烈孝友以及勲猷懋著懿行昭
垂者悉載於編以仰副

聖天子作人之雅化也夫志人物

同安縣志

卷之二十

名臣

一

名臣

蘇頌

吳燧

林希元

楊逢春

傅鎮

劉存德

洪朝選

陳道基

李獻可

蔡守愚

蔡復一

張廷拱

林一柱

林鈺

宋蘇頌字子容紳子登慶歷二年進士第知江寧建

業承李氏後稅賦無藝每發斂高下出吏手頌因
治訊他事互問民鄰里丁產得其詳及定戶籍民
自占不實者頌曰汝有某丁某產何不言民皆駭
服不敢隱遂剔蠹成賦簡而易行諸令視以爲法
至領其民拜庭下以謝民有忿爭諭以鄉黨宜親
善往往謝去或半途思其言而止調南京畱守歐
陽修委以政曰子容處事精密一經閱覽吾可無
省矣時杜衍老居睢陽見頌深器之曰如君直所
謂不可得而親疏者皇祐五年召試館閣校勘同

同安縣志

卷之二十

名臣

二

知太常禮院議立郭皇后神御殿事謂郭后無可
廢之罪仁宗有不當廢之悔宜祔郭后於后廟而
加一懷哀愍之諡庶不爲逼曾公亮深歎服之遷
集賢校理富弼與韓琦爲相同表其廉退知潁州
仁宗山陵調發倉猝爲度土產有無高估緩期官
自爲市民不知擾而課最他郡潁人德之通判趙
志忠本邊徼降者頌待以禮志忠感泣曰平生誠
服惟公與韓魏公耳歷擢知制誥判審刑院有知
金州張仲宣坐枉法贓論死法官援例杖黥頌奏

免之改流海外遂爲定例進銀臺司知審刑院時
王安石用事以李定爲御史宋敏求知制誥封還
詞頭復下頌當制頌報奏不具草次至李大臨亦
封還於是並落知制誥歸工部郎中班時稱熙寧
三舍人歲餘出知婺州方泝桐廬江水暴迅舟橫
欲覆母在舟中幾溺矣頌哀號祈顛舟忽自正母
甫及岸舟乃覆人以純孝所感徙亳州加集賢學
士知應天府呂惠卿嘗語人曰子容吾鄉先進苟
一詣我執政可得也頌聞微哂而已凡更三赦大

臨還侍從頌僅授祕書監知通進銀臺司吳越饑
選知杭州有百餘人遮道訴轉運司責逋市易緡
錢晝繫公庭夜禁廂院死無可償頌曰吾今釋汝
使汝營生期以歲月衣食之餘悉以償官可乎皆
曰不敢負于是盡縱之去轉運使怒欲奏頌沮法
而縱者乃先期還逋遂不敢言一日宴千郡治堂
聞將兵給集謀害官吏郡人喧傳不安頌談笑自
如密諭搏爲首者械送獄中治夜會散而坐客不
知也召修英宗仁宗兩朝正史轉右諫議大夫使

契丹遇冬至其國歷後宋歷一日北人問孰爲是
頌曰歷家算術小異遲速不同如亥時節氣交猶
是今夕若踰數刻則屬子時爲明日矣或先或後
各從其方可也北人以爲然使還以奏神宗喜曰
卿所對殊善因問其山川形勝人情嚮背對曰彼
講和日久頗竊中國典章禮義以維持其政上下
相安未有離貳之意昔漢武帝自謂高皇帝遺朕
平城之憂雖久勤征討而匈奴終不服至宣帝呼
韓邪單于稽首稱藩唐自中葉以後河湟陷于吐

同安縣志

卷之二十

名臣

四

蕃憲宗慨然有收復意至宣宗時廼以三關七州
歸於有司繇此觀之外國叛服不常不繫中國之
盛衰也頌意蓋有所諷神宗然之元豐初權知開
封府尋貶祕書監知濠州皆以治獄事被譖罷郡
未幾知河陽改知滄州入辭帝曰朕知卿久然每
欲用輒爲事奪命也夫卿直道久而自明頌頓首
謝召判尙書吏兼詳定官制因陞對神宗謂曰契
丹通好八十餘年盟誓聘使禮幣儀式欲修一書
俾有考據非卿不可書成帝賜名魯衛信錄元祐

初遷至吏部尚書兼侍讀奏謂人主聰明不可偏有所嚮惟應以無心則無不治每進讀至弭兵息民必援引古今以動人主之意既又請別製渾儀因命頌提舉頌既邃於律歷以吏部令史韓公廉曉算術有巧思奏用之授以古法爲臺三層上設渾儀中設渾象下設司辰貫以一機激水轉輪不假人力時至刻臨則司辰出指星辰躔度所次占候測驗不差晷刻晝夜晦明皆可推見前此未有也遷翰林學士承旨五年擢尚書左丞七年拜右

同安縣志

卷之二十

名臣

五

僕射兼中書門下侍郎賈易除知蘓州頌言易在御史名敢言既爲司監矣今因赦令反下遷爲州不可爭論禾決諫官楊畏來之邵論其稽留詔命頌遂上章辭位罷爲觀文殿大學士集禧觀使繼出知楊州徙河南辭不行告老以中太乙宮使居京口紹聖四年拜太子少師致仕方頌執政時見哲宗年幼諸大臣紛紜常曰君長誰任其咎每大臣奏事但取決宣仁后哲宗有言或無對者惟頌奏宣仁后必再稟哲宗有宣諭必告諸臣以聽□

語及貶元祐故臣御史周秩劾頌哲宗曰頌知君臣之義無輕議此老徽宗立進太子太保累爵趙郡公卒年八十二詔輟朝二日贈司空理宗朝賜諡正簡爲相時務使百官守職量能受任杜僥倖之原戒疆場之臣毋邀功生事議有未妥者毅然力爭之故當母后垂簾之秋能使元祐之治比隆嘉祐器局宏遠不與人較短長以禮法自持雖貴崇奉養如寒士自書契以來經史九流百家之說至於圖緯律呂星官算法山經草木無所不通工

筆札其蹟雜見鳳墅續法帖中尤明典故朝廷有制作必取正焉蘓轍謂曰子容博學強識其講說放失舊聞多得詳實嘗議學校欲博士分經課試諸生以行藝爲升俊之路議貢舉欲先行實而後文藝去彌封謄錄之法使有司參考其素行必自州縣始庶幾復鄉舉里選之遺論者躉之祀鄉賢吳燧字茂新紹定二年進士教授福州改知漳州賊寇竊發設方略扼要害屬縣以安累遷監察御史上疏以正紀綱開言路爲第一義冬雷復論鄭清

之爲執政弗畏天災宜俾奉冊就第而用宦官宮
妾不知名者代之疏入除大理寺卿不拜而去再
歲調爲祕書監入對願絕內降裁私恩聚忠賢抑
嬖倖節不給之費去不良之牧擢殿中侍御史兼
侍講時盛夏猶寒燧言宜崇陽抑陰洪天錫論董
宋臣等甚力燧請行其言改禮部侍郎未幾奉祠
度宗立召爲兵部侍郎卒燧彈劾數十卷皆通達
國體義形於色薦書數十人盡知名士祀鄉賢

明

同安縣志

卷之二十

名臣

七

林希元字茂貞號次崖正德丙子丁丑聯第進士授
南京大理寺評事世廟登極條上新政八要曰務
正學親正人用舊臣清言路急交修持久大息中
官機務以拔禍根罷中官鎮守以厚邦本又言臺
諫諸臣默默於往時曉曉於今日竽瑟混聽菲葑
奚採宜考覈以清言路進士周祚等疏言近來章
奏紛紜無如希元所陳者乞留神省覽見之施行
下所司議議上帝優詔嘉納焉遷寺正是時希元
名動兩都忌者側目會以議獄事忤寺卿陳琳南

京御史戚雄等疏論之降泗州判官泗饑辦賑周
詳青陽滄湖嘯聚九百人單車往諭皆解散且請
貸其罪而賑恤之境內以安復以不屈當路棄官
歸大臣交疏薦之再起寺正擢廣東按察僉事管
鹽屯二政條奏切近四款復以行於泗州者爲荒
政叢言上之帝可其奏通行天下尋改提督學校
其條訓多士務在闡繹經傳敦崇古典劇寇王畿
剽掠廣惠希元署按察篆率府衛兵指授方略卽
時討平御賜白金陞南京大理寺丞上王政疏爲

同安縣志

卷之二十

名臣

八

目二十有一秩滿留內時遼東軍陵辱撫臣希元
抗疏極言姑息之弊忤旨謫欽州知州壤接安南
城郭官舍半鞠墟莽悉心經畫之開誠先物約身
裕用塞弊竇興廢墜遷學育才廣置勸農之吏設
立屯田增修營堡一意教養捍衛會有征安南之
命希元熟究其國中虛實強弱人情向背慨然以
興復爲己任疏六上而奉命大臣圖安靖第受其
納歛請罪希元之說不行陞海北道兼管兵備珠
池朱崖軍民疲困珠盜橫行立條嚴禁一年而民

蘓盜息卒坐安南用兵事與督臣異議以拾遺罷歸欽人建祠生祀之希元慷慨鯁直有俯視流俗擔當宇宙之氣而才識亦練達世廟罷鎮守中官悉歸內監自其一疏啓之而安南歸命還四峒亦希元之議足以奪其魄焉家居手不釋卷晚年益究義理精微之極叅訂諸儒所定致知格物之說附以己見曰更正大學經傳定本所著易經四書存疑皆足羽翼朱子學者師之又有次崖文集祀鄉賢又建專祠特祀於 文廟之右

同安縣志

卷之二十

名臣

九

楊逢春字仁甫號西渠少有志氣每論爲人爲學輒以第一流自期嘉靖乙酉舉人已丑進士授仁利令未任丁外艱復補崑山令銳意任事賦籍獄牒胥吏不得竄手縣號富饒而一毫不染吳俗大戶領京運邑令寄書權貴金縑禮物皆大戶爲備逢春獨裁罷之民以此感逢春最深縣賦稅繁且重民力不能給者逢春不忍急之行取至部以錢糧不及緩三牛乃得南京浙江道御史骨鯁獨持痛惡依阿渙恣之習遂抗疏列論兩京九卿大臣之

脂韋者十餘人劾退挾賂奔競之濫拜宮僚者一時風采凜然又陳江北屯田利弊知無不爲巡視江南倉汰黜貪庸風采振竦擢廣東僉事備兵嶺南疆界遐曠猺獞蕃育將玩卒惰賊白日剽行旅逢春首責郡縣修政息民易將選卒指授方略賊發輒得夜門不閉事無畏難諸所剔蠹甦民雖不屬己亦毅然任之丁內艱復補四川僉事專管鹽屯利源所在豪右猾吏穴之爲綜刷成額按籍考要僞巧無所飾課入日進時敘州戎縣都蠻叛肆

同安縣志

卷之二十

名臣

十

行殺掠邊無居人逢春獨抗言禦取之策撫按會檄委辦度險阨分兵進剿陽撫其四鄉以剿二鄉爲師名果得四鄉最傑者四十人以來盡殲之用是兵入有功俘斬千計擢湖廣叅議分部潭邵之間平賦分役節穴興教凡所當爲悉力從之縱有犯忤不恤也性孝友與其弟不立私財居鄉敬老字幼不以貴倨鄉人慕悅陞雲南按察副使未升而卒於湖南民走哭相踵不絕喪歸罷市舉聲以過出境乃止王慎中爲銘其墓祀鄉賢

傅鎮字國鼎嘉靖戊子舉人壬辰進士由行人授南
京御史疏諫聖駕無數幸山陵帝嘉納之有守璫
潘真挾私亂政陵虐軍士鎮言真不當以嬖倖開
利竇殘朝廷赤子請按真姦賊果有左驗逮治之
已念母病請歸旋補廣東道御史歲辛丑北兵大
掠三晉以西地總督樊繼祖第與諸將帥堅壁自
衛而先後報首功至五百餘級鎮疏其欺罔盛張
功伐實未嘗與敵戰也勘果如其言褫繼祖職武
定侯郭勲獄事下錦衣孫綱推問受賂絳何英等

同安縣志

卷之二十

名臣

十一

以脫勲罪有旨覆治鎮坐勲及勲綱交私罪餘分
別寬貸之出按雲南會母卒服除補職巡真定又
巡山東屬妖人謝漢商大常作亂擒獲黨與甚多
郡縣概具獄磔鎮論殺首惡餘脅從者三十餘人
悉放去入署河南道掌計事嚴嵩欲黜觀察使一
人鎮不從憾之出爲河南副使有治河羨金三千
餘悉封識之庫中人指其金曰傅真金從鎮名廉
之也轉廣西叅政浙江右布政遷湖廣左布政鎮
在粵西時有議逐流民者鎮曰彼亦民也况閒有

師儒醫卜商賈之屬可裨我民柰何驅之既轄楚
進南有都御史提督操江尋以病乞歸鎮爲御史
凜凜風裁貴戚豪強斂手時目爲傅虎及行法停
讞出於仁恕人多德之敷歷藩臬漸致大位中外
倚重焉萬歷中卒賜祭葬祀鄉賢弟鑰

劉存德字至仁號沂東嘉靖丁酉戊戌聯第進士初
授行人持節冊祭益府嗣王雅善修飭自稱勿齋
氏存德因宴爲陳四勿之旨嗣王前席罷宴曰昔
菑川論三仁今大行陳四勿足相方矣贈滿百金

同安縣志

卷之二十

名臣

十二

爲治裝亦值百一無所受獨拜持篆書四幅歸旣
報命居三載選浙江道御史會有獻四親廟圖說
請祧孝廟者抗疏力諍世宗震怒擲疏竟以理不
可奪得降俸時亢旱章報下震雷大雨如注京師
水二尺歡聲動地羣稱劉御史一言回二天云視
兩淮鹺籍羨儲十萬請賑貧民得報可兩淮賴之
按應天潘少宰故存德所舉主其子弟殺人匿不
出十年存德旣至而其子弟就逮視其獄不可生
竟論抵爲書以謝潘出守松江時苦旱六載逋賦

至二百餘萬特設參政督之存德拊循安卹請使
者寬期以候秋成是歲大穰使者欲盡征及額存
德又請分三載其後浹歲大熟遂補積逋什之五
六值倭寇逼境近邑男婦奔郡城監司恐奸細欲
嚴盤詰存德力爭謂稍緩則男婦悉遭擄矣奉使
便道歸省丁外艱服除卽家起知南康府病未赴
歲餘稍遷浙江按察副使檄攝嘉湖諸軍不三日
斬倭首百三十級上功匿不以聞調廣東海道兼
諸番市舶利歸藩司提兵援潮陽諭降劇寇許朝

同安縣志

卷之二十

名臣

十三

光等八千餘人朝光斬臂誓不復叛以功見嫉被
中歸與弟中分產而推其腴事繼母湯藥親嘗爲
宗人治產授室喪葬婚娶以次及母妻二族所識
貧乏待以舉火者數十家種秫釀酒座客常滿善
大書工古文詞其史評制義博士家宗焉隆慶丁
卯修志其議論皆關邑典後多採之病亟自輓有
易簣從教華且皖布衿止辨正和斜之句卒年七
十一著有結甃堂遺稿十卷行世祀鄉賢子夢松
夢潮皆進士

洪朝選字汝尹一作字舜臣號芳洲更號靜菴嘉靖丁酉

舉人辛丑進士除南京戶部主事出榷北新關口
貨算緡度歲課幾何盈額而止津梁不閉任舶上
下事竣督放倉儲諸有規畫後人引以爲法一日
思所學未足非古人學優則仕之意上疏引疾客
毘陵僧舍與唐順之講德問業一年始歸又就王
愼中上下議論久之充然有得起爲南吏部郎出
督學西蜀端士習正文體持法秉公人想望其丰
采遷廣東參政調山西歲大侵寇盜充斥多方撫

同安縣志

卷之二十

名臣

十四

輯殪其元兇破其黨與晉人頌之朝選不爲嚴嵩
所善而徐階深與之嚴敗遂以山西參政召入爲
太僕少卿尋進僉都御史提督操江疏論盜所由
起與所以止盜之方鑿鑿可行留都以靖旋進副
都御史巡撫山東禔躬以道馭下以法疏陳養民
課吏之政甚詳他議驛遞防河皆爲經久計檄所
司清差重役繁之弊隨地編差因糧制役巨戶無
所規避藩府官校奪民田禁革之悉歸民齊魯肅
然隆慶戊辰入爲刑部侍郎伸直臣沈鍊儒臣閻

樸冤而正巡撫楊順於理徐階去位張居正秉樞
遼王憲爚獄起居正以私憾欲以謀反置之死地
除其國屬朝選往勘命方下居正來謁坐定曰貴
處傅應嘉謀反今敝省遼王謀反朝選默然出門
又曰聞遼王差人入京行賄朝選曰果然當題奏
乃疏奏凡楚人入京皆盤詰沿途差兵護送勘事
官員及至襄陽撫按道府已勘成招副使施篤臣
抱牘請書名朝選曰未提審一人徒據現案成招
何須命我公等自成之可也數日施復來見曰遼

王府中豎招兵旗反形已露朝選曰果反則我爲
興師討罪之大臣不然則勘事之大臣使人往覘
之報曰兵圍遼府三匝信息不通王聞法司到無
由訴豎旗府內書仲冤二字終日跪伏旗下候命
朝選曰此臣子待罪禮也匹夫犯重辟求訴問官
尚當審確招詳况親王乎古人有焚梁獄詞者柰
何嬖權貴傷國家親親意置其事不問亡何施篤
臣又請云大人招要改便改必欲提人按覆審三
年亦招不成朝選見羅織已定不得已應曰除去

謀反二字其淫虐貪暴則依前招遂以遼王照戴
掄典英事例送發高牆除其國母王氏妃給田十
頃屋一座養瞻終身奏入居正猶以爲左心惡之
一時法司同往勘者俱論罷朝選辨本有權臣主
使之言居正忿益甚遂以大計劾罷歸會御史劉
畏所疏論居正指摘及施篤臣朝選曰令我聽指
使誣以反劉疏及我矣居正聞益恚謂朝選不死
且與劉犄角我也又當居正奪情時進士鄒元標
翰林吳中行疏列其不孝狀削籍遠戍朝選曾移

書壯之稱其文章節義爲居正所跡憾益深不可
解于是密使私人授旨於閩中諸當事或起之田
閒或陷以大位或懼以顯禍冀結其欲而速其謀
有知其冤不肯從者有身受其薦不忍從者朝選
性剛介不能容人過失里中不平事狷激言之有
宦家子摸捏朝選手板撫有司短長言于當道朝
選不知也時左布政勞堪以支放邊戍月餉搭新
鑄錢失軍心巡撫耿定向檄止之語頗侵堪適耿
招朝選講學每咨以時政堪疑朝選實中之耿以

憂去勞代之遂希居正意乘是籍快已憤陰遣邑令金枝日夜捫撫其無情事以報勞得之大喜以聞於朝居正從中擬旨削籍逮訊堪得密報遂馳戎卒逮朝選下臬獄不二日斃之獄中且謂朝選在川中得回生藥暴尸四五日不得出尸蟲至出戶朝選居官廉潔以名節自砥礪生平有學行政事之稱致身卿貳而家故貧嘗有詩云負郭原無半頃腴山田新買百升餘里人莫笑清貧甚欲學周黃恐不如林居十年許一旦嬰奇禍以死士大

同安縣志

卷之二十

名臣

十七

夫無不扼腕冤之者子兢訟冤闕下居正矯旨杖八十仍奪蔭其夏居正暴卒都諫李廷儀條其冤狀朝議堪回籍繼奪職甲申兢再訟父冤有旨下堪獄戍定海未幾詔復朝選官兢補蔭如故一時阿堪意鍛獄及造謗者俱相繼竄逐朝論猶以堪不正典刑未快人心云朝選善爲文所作有氣岸類其人著有芳洲摘稿歸田稿續歸田稿祀鄉賢陳道基字以中號我度徙晉江嘉靖己酉庚戌聯第進士授浙江嘉善知縣廉約明恕吏民畏懷以卓

異徵聞母計奔歸復除雲南道監察御史巡按廣
四時邊徼諸吏類多闖茸下車按其尤無良者墨
吏望風解綬去行部詢民疾苦銳爲興革尤加意
造士復按廣東柘林兵叛流劫會省城門盡閉商
民數千萬委堞下道基嚴兵陳郊坐城郭納入之
振飭風稜郡邑應聲澡雪諸所措注咸足貽方來
畫一以積望擢太僕寺少卿尋移南鴻臚卿爲讒
者所中出爲四川副使遷廣西叅政拊循益力屬
邑告變察其故罷掎克令扶悍尉各一人諸巢遂

戢城西南河流舊故橫溢爲築橫橋而東之與灘
江會公私交賴再遷浙江按察使超拜南京都察
院右僉都御史提督操江卽歲改應天巡撫時高
拱復相修徐階宿憾意曩道基外調時徐階尸之
必將快意於階藉手爲釋憾地而道基禮階益恭
吳中巨室爲猾少持無寧日道基檄下所司諸告
密株連者置勿問溧陽史氏有奴誣主者下奴獄
論死自是告訐之風頓息吳中人謹若更生言官
吳某復揣柄臣微指誣摘其短卽日解組行歸遭

外艱讀禮鍵戶廷議用宿望起巡撫順天■
除戎器覈幕府市租爲饗士費拂大帥意張相居
正以歸塋故往還良涿間督臣躬迓道左道基獨
臨邊自如遷南大理寺卿進南戶部右侍郎總督
糧儲尋以工部左侍郎召入督陵工遷南刑部尚
書有孝廉與序班鬪都市前司寇奏當得旨矣吳
歛二相力爲地道基持不動於是言官復疏其短
再疏乞歸竟得請□基長身玉立廣顙豐顴性抗
挺自負一中讒戎再被謗書不以其故少貶嘗曰

同安縣志

卷之二十

名臣

十九

我道因是耳家居敷門寡接人弗敢以私干而獨
篤故舊崇長厚旣爲列卿見鄉先達逡巡隅坐其
接後進必與鈞禮歷宦不攜家室不置妾媵晚歲
復寢一室左圖右史布衾縑幃蕭然寒素喜談星
命堪輿多奇中年七十五卒撫按以聞於朝賜祭
塋祀鄉賢

李獻可字堯俞號松汀隆慶丁卯舉人萬歷癸未進
士初授武昌府推官疏滯雪抑讞獄得情上官事
有不決屬之輒刃解臬掾有犯法者臬囑寬之不

從徵入戶科給事中會潞王之國疏請諭制在國無以縱敗禮在途毋以擾困民太后聞大怒請加譴帝特全之越日讌宮中疏自袖墜顧近侍曰此李某疏勿失也他如請內帑以賑饑饉決章奏以防壅蔽伸法紀以全安攘所條陳悉中窾轉禮科右刑科左主試山西時慶得士值京考以莊愼輔鑑裁物情翕如陞禮科都給事拜官甫三日上皇太子出閣講學疏言冊立之典可稍緩而待來年諭教之典不可停而虛今日皇長子今年十一歲

同安縣志

卷之二十

名臣

二十

去古人八歲始學之時已踰其三宜及今春孟特令禮卿酌定儀注擇吉施行■ ■ ■ ■ ■宜選孝悌博聞有道術者爲之何必委巷伯之倫而秘之房闈之內哉疏入有旨謫外元輔王家屏力救封還內降至於再三帝怒甚削籍罷歸家屏亦遂致相事獻可抵■日以書史自娛事繼母孝撫季弟甚篤悉予先貲構廬居之誘誨歛至人先知其爲異母也溫謹謙遜與人交情至於文不以所長掩人不日人過有善吹揚如不及起家二十年田宅

僅中人產年六十一卒祀鄉賢

蔡守愚字體言號發吾浯洲人萬歷乙酉丙戌聯第
進士授南儀制司主事迎母就養暇與同舍諸名
公證彙古今所得益深詩文日進丁內艱歸襄事
畢採摭前言往行有裨風教者彙爲明倫寶鑑一
書後除工部屯田司主事督理易州龍灣二廠舊
時炭直不早給而惜薪司復從中索例不得以時
納甚且以不如式駁還大爲商病則爲移內外主
者與訂約時其出納給直令商自兌不經他手凡

同安縣志

卷之二十

名臣

二十一

日用薪蔬例供槩從減省曰毋令有餘以爲市又
興二廠社學躬往課督時內官四出採礦守愚曰
民方上供炭課倘被流散誰執其咎且近京師安
得有礦將抗疏諍事遂寢擢虞衡司員外遷屯田
郎中去日諸商環擁車爲之柅守愚曰有二社學
在令子弟勿廢業吾棠不翦矣是時方急殿工物
力告誦力贊大司空疏借內帑以郡國贖輸補償
之得報命陞四川副使分巡上川土酋肆掠播州
尤甚以兵備討平之帝嘉其功改播爲遵義晉參

政整飭威茂擢按察司陞右布政皆分道川南會
六詔不靖中丞喬公薦守愚以原官移節廷昌建
地延袤三千餘里五衛八所棊置于貉獠番棘間
蠡聚烏散剽掠多年守愚先後巡川南最久時土
婦瞿繼良與其叔馬應龍爭印仇殺授計遊擊吳
文傑直入其臥內持印而出嫂叔投戈聽命藺州
土婦奢氏爭權畱印惡目簸弄其閒檄往會勘議
獻首惡及追印爲先如印不可得則疏請更鑄至
首惡惟縛獻目把餘不足問議乃定楊酋陷綦江

同安縣志

卷之二十

名臣

二十二

帝命總督李霖寰徂征守愚以畫策督餉功賜白
鏹採木役興在川南則條無木之難無錢糧之難
并陳諸難易情形甚悉在建則條募夫採木出水
三難又請司帑先給三分之一而以建昌之杉易
重慶之楠兩地交便威茂餉米三萬餘藩司給直
灌縣買運不時積欠無稽爲條包攬塘塞乾銷私
兌那新補舊諸弊竇立三限掛銷獎戒法分派新
繁崇寧郫彭產米諸邑店戶買米不齊驗糧官督
之腳戶運米不到監收宮督之其久逋者量追米

腳價給軍自是威茂無滯餉其徒建昌則寄孥雅州單車泣焉忽猓從山谷突出衆驚竄守愚端坐不動猓至曰此菩薩也相率禮拜去至則宣布恩威申明約束番夷戢服復爲畫善後諸策改將增兵俾嚴戍守爲建南計安備殫心力先後擒斬惡夷七百餘追還被擄男婦五百餘以積勞成疾乞休者三而兩臺苦畱之遷雲南左布政候代會大帥侯某移鎮越嵩欲計擒黠酋烏撒以爲功亟馳止之曰是未可輕也彼巢據官道而力能號召執

之必啓釁旣別去而帥決計誅之自是酋孽奮呼諸夷響應道路梗塞踰旬守愚聞報失聲曰不聽吾言噬臍何及爲撫諭熟夷檄將召兵然後利濟鎮西之閒享無事焉其威惠素孚也未幾得代致仕而直指彭某竟用流言以考功法中之蓋自建南被禍士民日請大征而當事日議鵬剿然三尺孤懸兵餉難處惟守愚謂宜繕儲胥討軍實以防與撫爲持久計所以安建者在此而得咎亦由此初土官安世隆爲那固所弑孽婦祿氏糾夷報復

藉口夫亡妻繼求管事而陰欲嗣姪祿祈奸弁奸生有居爲奇貨者守愚責以大義俾逐祈而立安世業然後許之烏思藏之貢者不無生事內地臺使題參部覆議革而各番求復不已守愚謂貢額國初已定彼賣勅之利孰與貢賞之所獲厚川省三萬茶引亦惟貢番貿易通行今關門一閉無論茶法爲沮卽軍需且歲增數萬竟如其言復之于是諸番願世世奉款而肖守愚像于宏化寺中嘗署藩篆一月籍羨金千餘無所取吏白以例且曰

同安縣志

卷之二十

名臣

二十四

如後來者何笑曰我自有羨後人自無兩不相妨其廉不近名如此生平學術行誼一遵程朱爲人樂易質直無媵媵態以故特立寡援至家埽軌讀書絕跡城市扁所居軒曰寧澹客至尊酒盤殮不爲厚具曰惟澹可久戒諸子曰得不得命也非分之有不必過求爲詩有魏唐風味文出入經史具載百一齋稿中年七十卒祀鄉賢

蔡復一字敬夫號元履用明子萬歷甲午乙未年十
九聯捷進士給假歸娶授刑部主事歷員外郎有

所平反多出其判丁兩艱服除補兵部車駕遷武庫郎中每陳籌邊事宜司馬採以入告久之遷湖廣參政分守荆岳清積逋覈虛冒革加派足軍精嚴保甲禁驛騷杜參謁壬子癸丑雨驟江漲堤蕩盡決極力賑恤時三道並缺奉檄兼署辰沅諸郡多積逋兵乏餉三年呼癸脫巾在途檄諭之兵素服其威信諫始輯亡何鎮筭諸營復沸嚴諭不歸營不給餉比聽命乃措給之參戎請調苗兵千人制之不從曰豈有借苗兵殺民兵之理徐按首禍

同安縣志

卷之二十

名臣

二十五

七人正法鴟張始息進按察使大小五冲苦苗患攝兵備篆十月三度報捷復築邊墻七十餘里又黑苗屯鎮遠偏橋閒官道爲梗出牛酒令兵民誓相應援道始通會黔撫有大征紅苗之議檄永順保靖二土司助蜀土司攻之復一云狃苗禍專在黔黑苗害楚淺而害黔深紅苗毒蜀蜀宜角之今黔代蜀憂不以黔殉而逼楚殉之毫衆葛耕烏能保以鄉鄰挺纓冠之鬪天拂黔撫意遂引疾歸時已推河南布政楚人請以加秩畱原任旨報可而

後一堅辭回家囊中如洗抵里猶未有居光完卽位起備兵易州遼陽報陷出俸金募鄉壯修器械爲備而京中諸貴人遣妻子避難乘傳絡繹不絕下檄非奉廷遣悉裁其符銜者疏誣其聞變涕泣復一上章自理且揭云請以兵加頸誰先皺眉請同過三岔河譙先縮足又云必書帕關說之外方有真人品言者大慚擢山西左布政以病告爲納言所格南返聞河西復陷歎曰茲豈臣子養高日哉力疾之晉時邊精緊急加派難堪上蠲增餉抵

京運二疏格不行又于逋者裁其浮征勉以正額民爲樂輸宗祿邊儲原緘給發在任凡七閱月天啓二年以右副都御史撫治鄖陽益勵清白歲大旱步行祈禱自狀其罪布衣素冠自繫干獄是夕遂大雨寮屬士庶迎之乃還鄖賦萬金加額至四萬有餘復有舊逋七萬餘疏請免之覈屯額肅軍實飭吏懷民種種畢舉三省視爲領袖奢崇明安邦彥反貴州巡撫王三善敗歿進復一兵部右侍郎代之喪亡之餘兵食盡絀斗米銀八錢復一勞

徠拊循人心乃定尋代楊述申總督貴州雲南湖
廣軍務兼巡撫貴州賜上方劍便宜從事節制五
省復一乃召集將吏申嚴紀律遣總理魯欽等救
凱里斬賊衆五百餘賊圍普定梟賊閒陳其愚以
殉遣參將尹伸副使楊世賞等合擊之邦彥負傷
而逃遂搗其巢斬首千二百級發兵通盤江路斬
逆酋沙國珍及從賊五百已大破賊汪家冲斬首
二千欽等復破賊汪家冲蔣義寨斬首二千二百
長驅織金織金者邦彥巢也緣道皆重關疊隘木

石塞山徑將士用巨斧開之或攀藤穿竇而入賊
戰敗遁深箐斬首復千級窮搜不得邦彥乃班師
是役也焚賊巢數十里獲牛馬甲仗無算復一以
鄰境不協討致賊未滅請勅四川出兵遵義畢節
抵水西雲南出兵霑益抵烏撒犄角平賊帝悉可
之因命廣西雲南四川諸郡鄰貴州者悉聽復一
節制六疏請益餉未下而施州遵義兵萬餘始至
衆議因銳渡河復一戒勿深入令渡河六十里劄
谷里驛酌進止乃兵甫渡河而施兵先逃二千餘

魯欽謂師退必散不如直搗其穴遂徑趨水西遇賊數萬力戰破之斬馘千餘次日霧賊來襲戰卻之是晚施兵先潰賊從後襲擊諸營盡潰死者數千人時復一爲總督而朱燮元亦以尚書督四川湖廣陝西諸軍以故復一節制不行於境外欽等深入四川雲南兵皆不至復一自劾因論事權不專故敗巡撫御史傅宗龍亦以爲言廷議移燮元督河道令復一專督五路師御史楊維垣獨言燮元不可易請令兼復一任帝用維垣言解復一任

聽勘而以王瑊爲右僉都御史代撫貴州復一俟代仍拮据兵事與宗龍計剿破烏粟螺蝦長田及兩江十五砦叛苗斬七百餘級賊黨安效良首助邦彥陷霑益雲南巡撫沈儆烝遣兵討之未定遷侍郎去代者閔洪學招撫之亦未定及是見雲南出師懼約邦彥犯曲靖尋甸復一遣許成名往援賊望風遁長田苗酋天保阿賈約水西賊欲斷平越餉道復一在病中曰一息尙存豈可以賊貽君父憂檄諸將分路進剿遣劉超等生擒保賈殲賊

首五十餘名破百七十四砦斬級二千三百五十
有奇平越人謂入三百年不到之地成二百年未
有之功而西賊失一大臂矣捷報正患瘡痍扶病
至平越愈劇猶上捐俸助工疏十月卒於平越軍
中訃聞帝嘉其忠勤贈兵部尚書賜祭葬諡清憲
蔭一子官廷議欲諡以忠不果避魏璫名也復一
學博才高下筆千言兼工四六他諸著作皆崇論
宏議涵古茹今至書牘奏議之文慷慨談天下事
切劘豪貴披吐肝胆而詩則出入漢魏唐宋閒居

同安縣志

卷之二十

名臣

二十九

然一代名作生平耿介負大節有志聖賢之學經
濟文章特其緒餘人比之張襄惠嘗自易州貽何
喬遠書曰宮事則客媼與魏闔相表裏朝事則牛
李構鬪疆事則經撫矛盾而戰守無穩著此三憂
也淮南憚汲黯江左有夷吾將誰望之後皆如共
言其餘論遼事有五未解論銓政有四疑論時事
有三無四多論大學歸于物我一本論克己謂惟
克己乃由己又云某生平服膺三言報國恩以忠
心擔國事以實心持國論以平心又云某惟學正

己不求四字耳所著有遯菴全集特祀鄉賢

張廷拱字尚宰號輔吾萬歷丁酉舉人辛丑進士授
懷寧令清內使挾帶私船寬省運民夫丁艱服除
補豐城捐俸築堤以利民改遷安編鋪平法遼左
車馬不疲奔命天啓中歷祠祭司郎中時朝中多
依附權璫獨廷拱正言讜論非端人君子不與交
遊削籍歸莊烈帝卽位求舊賜環以邊才擢僉都
御史巡撫大同召對稱旨帝顧近輔曰廷拱福將
也至則給宗祿恤飢軍修土堡制火器邊計靡弗

同安縣志

卷之二十

名臣

三十

周密警告猝至禦變投機敵不能犯以焦勞成疾
及亟諄諄誠諭諸將竭力報國言不及私卒年六
十五賜祭葬諡襄靖祀鄉賢

林一柱字廷郢號璞所啓元孫萬歷丙午舉人庚戌
進士初理揚州薦糾綜覈輿情允協治獄多平反
不輕鞭扑歷署三篆皆有廉名試湖廣御史疏奏
切直請臨朝正紀綱有六逆五盡二反一順之目
海內傳之熹宗初年疏數上歷陳賣士餉卒名存
實亡之弊雪幽忠明功罪至有世運當阨舉國若

狂之句畱都東宮火請復建文廟號劾織造監李
實制官虐民必亂天下闔黨側目因請告例轉廣
東參政拂袖歸居家以孝友稱及再召而一柱已
卒祀鄉賢

林鈺字實甫龍溪籍萬歷壬子舉人丙辰進士殿試
一甲第三人授翰林院編修歷國子監司業遷祭
酒監有銅鼎銅缸爲臨雍會食及貯水備火之器
魏璫欲假鑄錢鈺持不與時璫擅權烜赫立祠幾
遍天下一日諸生執呈至鈺問云何對曰魏公功

同安縣志

卷之二十

名臣

三十一

德巍巍宜立像太學請定判鈺曰諸生宜熟思之
孔聖嚴師也禮有人主北面之尊魏人臣也若並
列座他日皇上入學謁奠君拜於下臣偃於上能
安之乎明日遂稱病去莊烈帝卽位聞之歎曰危
行言孫君子也召復原官晉禮部侍郎兼侍讀學
士七年以枚卜召對陳用人理財靖寇寧邊四策
卽日拜東閣大學士入閣辦事時帝方疾黨人以
鈺誠慤不立門戶特加眷顧首輔忌之困以煩劇
遂以勞疾卒於官諡文穆鈺冲淡和平廉介自守

鄭芝龍受撫奉千金爲壽卻之復其書曰成人之美君子也因之以爲利非君子也芝龍亦爲歎服忠烈

蘇 緘

陳 顯

葉秉乾

劉 雄

周彝訓

胡有耀

郭 富

蔡希旦

黃岳竊

范 方

郭寅日

葉翼雲

同安縣志

卷之二十

忠烈

三十二

陳 鼎

張璇光

林壯猷

洪有禎

杜 輝

張 敏 明忠義附

宋

蘇緘字宣甫素負義氣寶元元年進士初授南海簿委查番舶商樊氏升階就坐叱杖之樊訴于州州責緘緘曰簿雖卑朝廷命吏也杖部民何罪之有州不能詰再調陽武尉有劇賊李者州縣莫能擒緘訪得其處率衆入賊巢大索火旁舍以逼之賊

從中逸出緘馳馬斬之送府府尹賈昌朝驚曰儒者乃爾輕生耶累遷秘書丞知廉州民茅竹爲屋多火災飭易陶瓦懲吏之貪墨者改知英州儂智高圍廣州緘募士數千人委印於提點刑獄鮑軻夜行赴難廣人有黃師宓者陷賊中爲之謀主緘擒斬其父復捕殺不逞者六十餘人招其誑誤者六十餘人使復業賊勢沮將解去緘分兵先扼其歸路與賊戰大破之奏至仁宗語執政曰南事淹時戰將未聞有成效蘇緘乃儒生能奮力如此宜

加優獎授供備庫副使充廣南西路兵馬都監遣中使賜朝衣金帶牙笏以寵之賊至邕大將陳曙以失律誅緘亦坐貶房州州同英宗卽位以大臣論薦復供備庫使知廉州戍卒禧醉焚營延燒民居乘以爲竊緘戮禧于市坐謫譚州都監未幾知鼎州熙寧初進加京使廣東鈐轄知邕州充皇城使交寇陷欽廉乘勢逼邕破四砦緘閱郡得羸卒二千餘選士乘舟逆賊斬蠻酋二設方略分地拒守請救于桂州沈起劉彝獨遣一將張守節以怯

懦敗外兵無一至者被圍四十餘日緘晝夜行勞士卒發神臂弓射賊所殪甚衆賊爲雲梯又爲攻濠洞蒙以華布緘悉焚之蠻計窮將引去而知外援不至或教賊囊土傅城頃刻高數丈蟻附而登城遂陷緘猶領傷卒馳騎戰愈厲而力不敵乃曰吾義不死賊手亟還州治殺其家三十六人藏于坎廼縱火自焚賊至求其尸不獲城中吏民被屠五萬餘人隕三州城以填江初緘憤沈起劉彝致寇又不救患欲上疏論之屬道梗不通廼榜其罪

同安縣志

卷之二十

忠烈

三十四

於市冀朝廷得聞焉神宗聞緘死嗟悼至晡時方進膳歎曰可惜蘇緘近世忠義之臣罕見其比贈奉國軍節度使諡忠勇賜都城甲第上腴田十頃聽其家自擇以子元爲闔門祇候召對便殿諭之曰邕州賴卿父守禦桂象皆得保全昔張巡許遠以睢陽蔽捍江淮較之卿父不能過也改元爲殿中丞通判邕州子孫與緘同死者皆褒贈起與彝坐謫官後交人謀寇桂州行數舍見大兵從北來呼曰蘇城隍領兵來報怨懼而引歸邕人祠之元

祐中賜額懷忠祀鄉賢又祀忠義祠

明

陳顯洪武壬子舉人知德州太宗時爲燕王廉其才
辟掌書院嘗乘奔諷諫旋以病告靖難初遣使召
顯夜沐浴具衣冠再拜而死祀忠義祠

葉秉乾慷慨尚義正統辛酉饑出稻二千石以賑貧
民賜敕旌義勞羊酒復其家己巳沙尤寇羅興甫
作亂請于官督民壯殲之山賊陳敬德攻縣掠鄉
募義兵千餘從主簿蔡遴擊走之海賊張秉彝駕

同安縣志

卷之二十

忠烈

三十五

船二百餘圍中左千戶率兵戰卻之賊退復圍高
浦秉乾力戰俘賊十餘斬首數百級賊怒鳩衆圍
之豪嶺突圍被執脅之從大罵曰吾奉義討賊不
幸力屈速殺爲幸豈從汝反賊誘之再四不屈肢
解之成化初御史涂棐奏旌其門曰忠義祀忠義
祠孫元齡嘉靖初應義隨大兵破滅汀賊有祖風
劉雄字逸圃倜儻尚義兄早故獨肩子職經營致富
所居積善里在泉漳孔道之傍官吏過往者皆宿
其家供帳迎款不稍怠門下食客數百人多勇敢

忠直之士藉以捍衛鄉井固守封疆正統十三年沙尤寇發由漳襲同雄度邑中倉卒莫備乃散家財萬緡鳩義衆率門客家僮擊退之邑賴以完賊大恨越日復率衆來攻正交鋒間馬逸入海淖中家僮八人奔隨之盡被殲焉賊復縱火焚其居闔家俱遇害惟妾吳氏先是攜三歲幼子往鄰鄉母家得脫難邑令爲視殮致祭葬之本里路傍龍亭嶺後八僮祔葬於有鄉人哀之稱曰義墳坡元孫存德嘉靖戊戌進士

同安縣志

卷之二十

忠烈

三十六

周彝訓積善窰山人正統己巳歲倭寇近鄉倡義率鄉兵禦之馬陷泥濘中死之子懷炯以救父亦死之今其地號陷馬堰是也

胡有燿字子謙諸生素輕財仗義爲鄉人所信嘉靖戊午倭寇至其鄉有燿散財結社以禦之度力屈令其妻子宵遁謂之曰吾與衆盟義無獨去明日率其徒與鄉人併力爲拒賊計以脫諸婦女老稚力罷爲賊所得罵不絕口被戮獨慘事聞贈州同知給其子冠帶祀忠義祠

郭富字體仁後郭人慷慨尚義善射嘉靖戊午倭寇攻城中外震駭富奮不顧身從城上射殺二倭分巡盛公嘉其功賜以金不受越己未倭又攻城富率衆縋城而下追至埕西發矢又中斃一賊賊怒羣擁而前莫有援者遂爲所殺時五月廿九日邑人義而哀之

蔡希旦字可久號中溪習儒業弗遇力農以供親嘉靖庚申倭夷內訌念父未葬盡出家中藏羅諸庭而身守之已而倭不至偕二弟趣嚴具自操杵錘

同安縣志

卷之二十

忠烈

三十七

成墳至指盡血旣襄事而賊愈迫里中闔謀禦之推希旦爲首悉括丁壯得二百餘人晝夜巡警而親勸督之數日賊大至衆相視無人色希旦挺身而出衆從之賊揮刀引騎衝其胸倭從之十砲齊發衆遂奔希旦立不動一人曰衆潰矣乃引卻已而賊三道繞其後衆莫應者賊遂剗刃希旦死焉年甫五十希旦嚴謹仁厚嘗讀書野寺一婦夜款門希旦曰可速去恐僧見辱婦固求宿乃大恚閉門不納寺有小僧暴卒已就木矣希旦探其懷微溫

炙而起之旁舍嫗無子嘗向希旦乞食一日嫗不至希旦曰必病也遣子往視則臥簣憊甚復持粥粥之嫗病尋愈族有子忤繼母父怒將沈之水希旦曰子無狀誠當死然恐人以惑後妻殺前子也命撻之予以更新子因感激及遭難知不知無不流涕後以子守愚貴贈主事晉贈四川按察使黃岳竄崇禎初爲廣東英德尉四年寇犯城督兵戰死英德人祠祀之又祀本邑忠義祠

范方字介卿後遷長泰博學礪行推重于鄉天啓辛

同安縣志

卷之二十

忠烈

三十八

酉解元性耿介聯同志爲社異趣者擯不入與黃道周盧若騰沈佺期尤以氣節相尚試春官不□見逆闖濁亂時事日非歸閉戶卻掃無仕意崇禎初闖黨伏法乃更北上卒三困禮闈以道周薦國子監助教貧淡如常鬻文自給見流寇鴟張國計漸蹙每在學舍扼腕嘆息歷遷戶部員外郎以給軍餉籌守禦力言于主者未幾闖賊陷京師朝中或屈膝迎降或竄匿苟免或被拷掠索金獻至數十萬惟方及范景文馬世奇金鉉等數十人死焉

方闖賊入整冠帶坐部署如故賊執之問倉鑰誰掌曰我掌問匙安在曰頭可斷鑰匙不可得鋒刃交下猶噴血怒詈濺滿署堂面不改色賊開倉鑰堅若錮斫門始得入人謂方魂實爲之其長子登楓爲同邑諸生甫冠婚自家來省視適遇難揮之不去殮方旣畢號痛出血數升絕吭其旁有老僕爲并葬於邑之義塋方著作甚富以海氛蕩析無存唐王時盧若騰署浙撫上方死事有特闡死義之幽乞補褒旌之闕疏有命范方被執不屈大節

同安縣志

卷之二十

忠烈

三十九

可風准察明優卹嗣唐王敗遂寢祀忠義祠

郭寅日崇禎辛未歲貢任陝西平涼府通判陞同知李賊陷城寅日不屈與二子偕死之祀忠義祠

葉翼雲字敬甫一字載九崇禎庚辰進士知吳江縣初至歲大旱蝗緩征平糴捐俸設粥步禱龍祠日行數里立法驅蝗蝗皆墜湖死是歲雖災不害時議者以國帑詘欲因畝加賦翼雲條上其不便所省六萬周行城郭相度形勢令城外四周皆康衢可馳馬其上增築臺舍嘗自戎服閱兵郊外夜復

巡行闖闖間十七年夏北都變聞不軌者洵洵思
亂翼雲廉得其主名立捕殺之一邑帖然尤好獎
拔才士培養善類遷刑部主事乞歸吳民思之不
置唐王入閩擢稽勳員外後因城破被獲不屈死
闔門遇害

陳鼎更名命鼎字子凝號象圖祖籍漳州北溪仍入
漳庠天啓丁卯舉人甲申變後躬自耕稼混跡緇
黃唐王在閩復本邑教諭 大清兵至城陷鼎自
縊於明倫堂

同安縣志

卷之二十

忠烈

四十

張璇光號義山浯島人磊落自豪讀書有獨得年二
十補邑弟子員踰年餼於庠崇禎之季時事日非
自傷不能借箸報國每劇飲盡醉慷慨悲歌或繼
以痛哭及甲申聞都城煤山之變絕粒數日不死
持巾櫛嘆曰太祖頒諸生巾自冠臨朝三日取前
庶人後三公之義爲諸生者獨不可以三公之義
自効乎自櫛髮赴里中井脫未履其上投井中水
淺僅沒其半乃俯首就淺水中死聞者奔援之不
及時年二十有六曾孫時霖乾隆甲子舉人

林壯猷十二都周邊人崇禎間爲銅浯哨官福王時
遷都督同知守永定移駐同安我朝大兵至城
陷舉家死以殉

國朝

洪有楨字亮士嘗授徒里中督其子弟甚嚴謹丁亥
兵起有楨從俠客糾海邊壯士數百人守漳浦城
陷被執見大帥有楨挺立不跪目直視髮上指旁
執刃者皆大駭帥怒命縛于市磔之縣其頭于城
東門暑月血色數日不變青蠅無敢集久之卒

同安縣志

卷之二十

忠烈

四十一

投其頭于濠于是門卒皆病中夜狂叫若有物擊
之者乃相與求其頭羅拜瘞之有楨工書法做文
徵明賈人持售外國得重價歿後隻字之遺珍于
拱璧

杜輝弟杜遠灌口人康熙二年自海上歸誠輝加總
兵官左都督銜遠授廣東都督銜四年補輝廣東
右路總兵官七年缺裁奉召入京特授輝永兆
鎮總兵遠以原銜隨兄之任十一年值吳逆反輝
兄弟俱被脅至湖廣日圖歸正密遣人赴大將軍

貝勒王軍前訂期內應謀洩兄弟俱被戮其家屬
僑寓廣東逆平事聞 賜祭葬加輝光祿大夫達
榮祿大夫 賞給家屬回籍銀兩並米石等物

附明忠義一人

張敏字輔德涪洲人正統乙巳沙尤寇起敏季父益
彬集里中人保障爲仇所誣逮長者戍軍幼丁闔
割之敏與其兄張慶張本俱被闔送詣京師稍長
選八內庭敏雖幼而言動舉止迥異常兒凡有謀
爲出人意表英宗擇爲青宮近侍事憲宗恭慎無

同安縣志

卷之二十

忠烈

四十二

過遇事婉諫微言憲宗嗣位敏旦夕左右夜具衣
冠寢至子夜輒起以待有所聞見未嘗外洩外延
諸事概不干預忠謹之名溢于宮禁嘗奉命操練
騰驤四衛官軍兼理十九房馬政監督五軍大營
未幾賜璽書總督十二團營敏持嚴而能推心體
下偏裨士卒莫不懷畏前後賞賚若書籍圖畫蟒
衣玉器金鞍之類不可勝數又於常廩外歲給米
三十石特除其家戍軍籍五處召工圖其貌用璽
識歲月敏兄弟三人同入禁掖俱見寵任兄本以

御馬太監守備南京慶以司禮太監鎮守浙江而諸子暉鴻臚寺卿苗太常寺卿先是憲宗春秋高未子孝宗母紀太后以嬪御得幸有娠其時萬貴妃專寵昭德宮慮其妬害不敢以聞託爲病瘖得廢居安樂堂庚寅七年遂誕皇嗣將溺之敏曰今萬歲未子卽不遽上聞何至棄爲自是加意養育紀太后乳少敏時獻餅飴粉餌哺啜旣彌月與西宮吳廢后保抱維謹不使萬妃知以萬妃妬故亦不傳於外庭成化十一年孝宗已六歲憲宗尚未

知敏密結萬貴妃太監段英乘間言之未得便一日敏爲帝櫛髮帝照鑑嘆曰冉冉矣而未子敏伏地稱死罪曰萬歲有子也帝叱曰安得有敏叩頭言狀帝命亟召見時孝宗胎髮未剪長披地走入帝懷牽衣遊戲手捋帝髯帝大喜遂出示羣臣冊立爲太子徙居紀太后於永壽乙巳敏被疾帝累遣太醫院診竟不起訃聞震悼賜銀幣爲殯殮具遣司禮御馬二監治喪復賜寶鈔二萬貫祭二壇戶部給齋糧麻布工部造墳特賜冠帽牙牌玉帶

及孝宗嗣位追賜敏璽書官其家人於是苗累官
南京通政使列於九卿質至錦衣衛指揮同知管
衛事暉亦以慶蔭官光祿寺少卿食三品俸賜敏
瑩地通州三百畝守卒二十人其後有錦衣千戶
張鵬張臻百戶張宏恩澤之事閩所未有苗子定
登進士

卷終